

神異典第二百三十三卷

神仙部列傳十

後漢二 上成公

按後漢書本傳上成公者密縣人也其初行久而不還後歸語其家云我已得仙因辭家而去家人見其舉步稍高良久乃沒云陳寔韓韶同見其事

薊子訓

按後漢書本傳薊子訓者不知其所由來也建安中客在濟陰宛句有神異之道嘗抱鄰家嬰兒故失手墮地而死其父母驚號怨痛不可忍聞而子訓唯謝以過誤終無它說遂埋藏之後月餘子訓乃抱兒歸焉父母大恐曰死生異路雖思我兒乞不用復見也兒識父母軒渠笑悅欲往就之母不覺攬取乃實兒也雖大喜慶心猶有疑乃竊發視死兒但見衣被方乃信焉於是子訓流名京師士大夫皆承風向慕之後乃駕驢車與諸生俱詣許下道過滎陽止主人舍而所駕之驢忽然卒僵蛆蟲流出主遽曰之子訓曰乃爾乎方安坐飯食畢徐出以杖扣之驢應聲奮起行步如初卽復進道

其追逐觀者常有千數既到京師公卿以下候之者坐上恆數百人皆爲設酒脯終日不置後因遞去遂不知所止初去之日唯見白雲騰起從旦至暮如是數十處時或有百歲翁自說童兒時見子訓賣藥於會稽市顏色不異於今後人復於長安東霸城見之與一老翁共摩挲銅人相謂曰適見鑄此而已近五百歲矣顧視見人而去猶駕昔所乘驢車也見者呼之曰蘄先生少住並行應之視若遲徐而走馬不及於是而絕

按神仙傳蘄子訓者齊人也少嘗仕州郡舉孝廉除郎中又從軍除駙馬都尉人莫知其有道在鄉里時唯行信讓與人從事如此三百餘年顏色不老人怪之好事者追隨之不見其所常服藥物也性好清澹常閒居讀易少小作文皆有意義見此屋抱嬰兒子訓求抱失手墮地兒卽死鄰家素尊敬子訓不敢有悲哀之色乃埋瘞之後二十餘日子訓往問之曰復思兒否鄰曰小兒相命應不成人死已積日不能復思也子訓因出外抱兒還其家其家謂是死不敢受子訓曰但取之無苦是本汝兒也兒識其母見而欣笑母取抱之猶疑而不信子訓既去夫婦共往視所埋兒棺中唯有一泥兒長六七寸此兒遂得長成諸老人鬚髮畢白者子訓但與之對坐共語宿昔之間明旦皆黑矣京師貴人聞之莫不虛心謁見無緣致之有年少與子訓鄰居

爲太學生諸貴人作計共呼太學生謂之曰子勤苦讀書欲規富貴但召得子訓來使汝可不勞而得矣生許諾便歸事子訓灑掃供侍左右數日子訓知意謂生曰卿非學道焉能如此生尚諱之子訓曰汝何不以實對妄爲虛飾吾已知卿意諸貴人欲見我我豈以一行之勞而使卿不獲榮位乎汝可還京吾某日當往生甚喜辭至京與貴人具說某日子訓當到至期未發生父母來詣子訓子訓曰汝恐吾忘使汝兒失信不仕耶吾今食後卽發半日乃行二千里旣至生急往拜迎子訓問曰誰欲見我生曰欲見先生者甚多不敢枉屈但知先生所至當自來也子訓曰吾千里不倦豈惜寸步乎欲見者語之令各絕賓客吾明日當各詣宅生如言告諸貴人各自絕客灑掃至時子訓果來凡二十三家各有一子訓諸朝士各謂子訓先到其家明日至朝各問子訓何時到宅二十三人所見皆同時所服飾顏貌無異唯所言語隨主人意答乃不同也京師大驚異其神變如此諸貴人並欲詣子訓子訓謂生曰諸貴人謂我重瞳八彩故欲見我今見我矣我亦無所能論道吾去矣適出門諸貴人冠蓋塞路而來生具言適去矣東陌上乘驢者是也各走馬逐之不及如此半日相去常一里許終不能及遂各罷還子訓至陳公家言曰吾明日中午時當去陳公問遠近行乎曰不復

更還也陳公以葛布單衣一送之至時子訓乃死屍僵手足交臂上不可得伸狀如屈鐵屍作五香之芳氣達於巷陌其氣甚異乃殯之棺中未得出棺中噓然作雷霆之音光照宅宇坐人頓伏良久視其棺蓋乃分裂飛於空中棺中無人但遺一隻履而已須臾聞陌上有人馬簫鼓之聲徑東而去乃不復見子訓去後陌上數十里芳香百餘日不歇

靈壽光

按神仙傳靈壽光者扶風人也年七十餘而得朱英丸方合而服之致得其效轉更少壯年如二十時漢獻帝建安元年光已二百二十歲常寄寓於江陵胡田家無疾而卒田殯埋之百餘日人復見在小黃寄書與田田得書掘發棺視之中一無所有釘亦不脫唯履在棺中

費長房

按後漢書本傳費長房者汝南人也曾爲市掾市中有老翁賣藥懸一壺於肆頭及市罷輒跳入壺中市人莫之見唯長房於樓上觀之異焉因往再拜奉酒脯翁知長房之意其神也謂之曰子明日可更來長房旦日復詣翁翁乃與俱入壺中唯見玉堂嚴麗有酒甘肴盈衍其中共飲畢而出翁約

不聽與人言之後乃就樓上候長房曰我神仙之人以過見責今事畢當去子寧能相隨乎樓下有少酒與卿爲別長房使人取之不能勝又令十人扛之猶不舉翁聞笑而下樓以一指提之而上視器如一升許而二人飲之終日不盡長房遂欲求道而顧家人爲憂翁乃斷一青竹度與長房身齊使懸之舍後家人見之卽長房形也以爲縊死大小驚號遂殯葬之長房立其傍而莫之見也於是遂隨從入深山踐荆棘於羣虎之中留使獨處長房不恐又臥於空室以朽索懸萬斤石於樑上衆蛇競來齧索且斷長房亦不移翁還撫之曰子可教也復使食糞糞中有三蟲臭穢特甚長房惡之翁曰子幾得道恨於此不成如何長房辭歸翁與一竹杖曰騎此任所之則自至矣既至可以杖投萬陂中也又爲作一符曰以此主地上鬼神長房乘杖須臾來歸自謂去家適經旬日而已十餘年矣卽以杖投陂顧視則龍也家人謂其久死不信之長房曰往日所葬但竹杖耳乃發家剖棺杖猶存焉遂能醫療衆病鞭笞百鬼及驅使社公或在宅坐獨自恚怒人問其故曰吾責鬼魅之犯法者耳汝南歲歲常有鬼僞作太守章服詣府門椎鼓者郡中患之時魅適來而逢長房爲謁府君惶懼不得退便前解衣冠叩頭乞活長房呵之云便於中庭正汝故形卽成老鼃也大如車輪頸長一丈

長房復令就太守服罪付其一札以敕葛陂君魅叩頭流涕持札植於陂邊以頸繞之而死後東海君來見葛陂君因淫其夫人於是長房効繫之三年東海大旱長房至海上見其人請雨乃謂之曰東海君有罪吾前繫於葛陂今方出之使作雨也於是雨立注長房曾與人共行見一書生黃巾被裘無鞍騎馬下而叩頭長房曰還宅馬赦汝死罪人問其故長房曰此狸也盜社公馬耳又嘗坐客而使至宛市鮓須臾還乃飯或一日之間人見其在千里之外者數處焉後失其符爲衆鬼所殺按續文獻通考桓景嘗學於長房一日謂景曰九月九日汝家有大災可令家人作絳囊盛茱萸繫臂登高山飲菊花酒禍可消景如其言舉家登山夕還見牛羊雞犬皆死

壺公

按神仙傳壺公者不知其姓名也今世所有召軍符召鬼神治病玉府符凡二十餘卷皆出自公故總名壺公符時汝南有費長房者爲市掾忽見公從遠方來入市賣藥人莫識之賣藥口不二價治病皆愈語買人曰服此藥必吐某物某日當愈事無不效其錢日收數萬便施與市中貧乏饑凍者唯留三五十常懸一空壺於屋上日入之後公跳入壺中人莫能見唯長房樓上見之知非常人也

長房乃日日自掃公座前地及供饌物公受而不辭如此積久長房尤不懈亦不敢有所求公知長房篤信後告長房曰我某日當去卿能去乎房曰欲去之心不可復言欲使親眷不知覺去當有何計公曰易耳乃取一青竹杖與房戒之曰卿以竹歸家便可稱病以此竹杖置卿所臥處默然便來房如公言去後家人見房已死屍在牀哭泣葬之房詣公恍惚不知何所公乃留房於羣虎中虎磨牙張口欲噬房房不懼明日又內於石室中頭上有一方石廣數丈以茅綯懸之又諸蛇來嚙繩繩卽欲斷而長房自若公至撫之曰子可教矣又令長房啗屎兼蛆長寸許異常臭惡房難之公乃歎謝遣之曰子不得仙道也賜子爲地上主者可得壽數百歲爲傳封符一卷付之曰帶此可主諸鬼神常稱使者可以治病消災房憂不得到家公以一竹杖與之曰但騎此得到家耳房騎竹杖辭去忽如睡覺已到家家人謂是鬼具述前事乃發棺視之唯一竹杖方信之房所騎竹杖棄葛陂中視之乃青龍耳初去至歸謂一日推問家人已一年矣房乃行符收鬼治病無不愈者

計子勳

按後漢書本傳計子勳者不知何郡縣人皆謂數百歲行來於人間一旦忽言日中當死主人與之

萬衣子勲服而正寢至日中果死

折像

按後漢書本傳折像字伯式廣漢雒人也其先張江者封折侯曾孫國爲鬱林太守徙廣漢因封氏焉國生像國有貲財二億家僮八百人像幼有仁心不殺昆蟲不折萌芽能通京氏易好黃老言及國卒感多藏厚亡之義乃散金帛資產周施親疎或諫像曰君三男兩女孫息盈前當增益產業何爲坐自單竭乎像曰昔鬬子文有言我乃逃禍非避富也吾門戶殖財日久盈滿之咎道家所忌今世將衰子又不才不仁而富謂之不幸牆隙而高其崩必疾也智者聞之咸服焉自知亡日召賓客九族飲食辭訣忽然而終時年八十四家無餘資諸子衰劣如其言云 按雲笈七籤折象廣漢人少好黃老之業後師東平先生虞叔雅亦得道者也篤尚養生元默無言家世豐裕以爲多藏厚亡無益散千金以賑貧苦或諫之象曰昔鬬子文有言我之施物乃逃禍非避富也智者咸服焉自刻亡日尸解如蟬蛻而去

魯女生

按後漢書華陀傳魯女生數說顯宗時事甚明了議者疑其時人也董卓亂後莫知所在

按漢

武內傳魯女生長樂人初餌胡麻及朮絕穀八十餘年日少壯色如桃花日行三百里走及麀鹿傳世見之云三百餘年後菜藥嵩高山見一女人曰我三天太上侍官也以五岳真形與之并告其施行女生道成一旦與知友故人別云入華山去後五十年先相識者逢女生華山廟前乘白鹿從玉女三十人并令謝其鄉里親故人也

王和平

按後漢書本傳北海王和平性好道術自以當仙濟南孫邕少事之從至京師會和平病歿邕因葬之東陶有書百餘卷藥數囊悉以送之後弟子夏榮言其尸解邕乃恨不取其寶書仙藥焉

成仙公

按神仙傳成仙公者諱武丁桂陽臨武烏里人也後漢時年十三身長七尺爲縣小吏有異姿少言大度不附人人謂之癡少有經學不受於師但有自然之性時先被使京還過長沙郡投郵舍不及遂宿於野樹下忽聞樹上人語云向長沙市藥平旦視之乃二白鶴仙公異之遂往市見二人罩白

傘相從而行仙公遂呼之設食食訖便去曾不顧謝仙公乃隨之行數里二人顧見仙公語曰子有何求而隨不止仙公曰僕少出陋賤聞君有濟生之術是以侍從耳二人相向而笑遂出玉函看素書果有武丁姓名於是與藥二丸令服之二人語仙公曰君當得地仙遂令還家明照萬物獸聲鳥鳴悉能解之仙公到家後縣使送餉府君府君周所有知人之鑒見仙公呼曰汝何姓名也對曰姓成名武丁縣司小吏府君異之乃留在左右久之署爲文學主簿嘗與衆共坐聞羣雀鳴而笑之衆問其故答曰市東車翻覆米羣雀相呼往食遺視之信然也時郡中寮吏豪族皆怪不應引寒小之人以亂職位府君曰此非卿輩所知也經旬日乃與仙公居閣直至年初元會之日三百餘人令仙公行酒酒巡徧訖仙公忽以盃酒向東南嚔之衆客愕然怪之府君曰必有所以因問其故仙公曰臨武縣火以此救之衆客皆笑明日司儀上事稱武丁不敬卽遣使往臨武縣驗之縣人張濟上書稱元日慶集飲酒晡時火忽延燒廳事從西北起時天氣清澄南風極烈見陣雲自西北直聳而上徑止縣大雨火卽滅雨中皆有酒氣衆疑異之乃知仙公蓋非凡人也後府君令仙公出郡城西立宅居止只有母一小弟及兩小兒比及二年仙公告病四宿而殞府君自臨殯之經兩日猶未成服

仙公友人從臨武來於武昌岡上逢仙公乘白驛西行友人問曰日將暮何所之也答曰暫往迷溪斯須却返我去向來忘大刀在戶側履在雞樓上可過語家人收之友人至其家聞哭聲大驚曰吾向來於武昌岡逢之共語云暫至迷溪斯須當返令過語家人收刀并履何得爾乎其家人云刀履并入棺中那應在外卽以此事往啟府君府君遂令發棺視之不復見尸棺中唯一青竹杖長七尺許方知仙公託形仙去時人以其乘驛於武昌岡乃改爲驛岡在郡西十里也 按續齊諧記桂陽成武丁有仙道常在人間忽謂其弟曰七月七日織女當渡河諸仙悉還宮吾向已被召不得停與爾別矣弟問曰織女何事渡河去當何時還答曰織女暫擬牽牛吾復三年當還明日失武丁

魏伯陽

按神仙傳魏伯陽者吳人也本高門之子而性好道術後與弟子三人入山作神丹丹成知弟子心懷未盡乃試之曰丹雖成然先宜與犬試之若犬飛然後人可服耳若犬死卽不可服乃與犬食犬卽死伯陽謂諸弟子曰作丹惟恐不成今成而犬食之死恐是未合神明之意服之恐復如犬爲之奈何弟子曰先生當服之否伯陽曰吾背違世路委家入山不得道亦恥復還死之與生吾當服之

乃服丹入口卽死弟子顧視相謂曰作丹以求長生服之卽死當奈此何獨一弟子曰吾師非常人也服此而死得無意也因乃取丹服之亦死餘二弟子相謂曰所以得丹者欲求長生耳今服之卽死焉用此爲不服此藥自可更得數十歲在世間也遂不服乃共出山欲爲伯陽及死弟子求棺木二子去後伯陽卽起將所服丹納死弟子及白犬口中皆起弟子姓虞遂皆仙去道逢入山伐木人乃作手書與鄉里人寄謝二弟子乃始悔恨伯陽作參同契五行相類凡三卷其說是周易其實假借爻象以論作丹之意而世之儒者不知神丹之事多作陰陽注之殊失其旨矣

孫博

按神仙傳孫博者河東人也有清才能屬文著書百餘篇誦經數十萬言晚乃好道治墨子之術能令草木金石皆爲火光照數里亦能使身成火口中吐火指大樹生草則焦枯更指還如故又有人亡奴藏匿軍中者捕之不得博語奴主曰吾爲卿燒其營舍奴必走出卿但諦伺捉之於是博以一赤丸子擲軍門須臾火起燭天奴果走出乃得之博乃復以一青丸子擲之火卽滅屋舍百物如故不損博每作火有所燒他人以水灌之終不可滅須臾自止之方止行水火中不沾灼亦能使千百

人從己蹈之俱不沾灼又與人往水上布席而坐飲食作樂使衆人舞於水上又山間石壁地上鑿石博入其中漸見背及兩耳良久都沒又能吞刀劍數千枚及壁中出入如孔穴也能引鏡爲刀屈刀爲鏡可積時不改須博指之乃復如故後入林慮山服神丹而仙去
按續文獻通考後漢孫博人有疾指之言愈卽愈出入山間石室如有穴者後仙去

莊伯微

按洞仙傳莊伯微者少好道不知求道之方惟以日入時正西北向閉目握固想崑崙山積三十年後見崑崙山人授以金液方合服得道

劉道偉

按洞仙傳劉道偉少入蟠冢山學道積十二年遇仙人試之將一大石約重萬斤以一白髮懸之使道偉臥其下顏色無異心安體悅又十二年遂賜以神丹服之昇天

盧耽

按洞仙傳盧耽者少學道得仙後復仕爲州治中每時乘空歸家到曉則反州營元會期會在列時

耽後至迴翔閣前欲下次爲威儀以箒擲耽得一隻履墮地耽由是飛去

昌季

按洞仙傳昌季者不知何許人也入山擔柴崖崩墮山下尙有微氣婦來見之涕泣哀慟仙人尹伊聞之愴然謂婦曰吾是仙人能治汝瘡卽以角煎賜之并付其方藥盡末差可隨合作也能長服之令人神仙婦以藥治季卽愈季合藥服之千日忽然飛昇婦流涕追之顧謂婦曰道與世殊卿善自愛敬婦慨然復合藥服之三年便復飛去至蓬萊山見季季曰知卿當來爾

李奚子

按墉城集仙錄李奚子者晉東平太守李忠祖母也不知姓氏忠祖父貞節丘園性多慈憫以陰德爲事奚子每興一志務於救人大雪寒凍路積稻及穀於園庭恐禽鳥餓死其用心如此今得道而居華陽洞宮中也

韓西華

按墉城集仙錄韓西華者不知何許人也慈愛於物常行陰功至於蛸翹微命皆愛而護之學道得

仙今在嵩山洞天之中

寶瓊英

按墉城集仙錄寶瓊英者寶武之妹也其七代祖名峙常以葬枯骨爲事以活死爲心故祚及瓊英令行女仙在易遷宮中

劉春龍 郭叔香

按墉城集仙錄劉春龍郭叔香並不知何許人也以其先世有陰德故皆得遁化練景入華陽易遷宮中劉春龍寶瓊英韓太華李奚子並天姿嚴麗儀冠駭衆才識偉鑠皆得爲明晨侍郎以居洞中侍郎之任以良才舉之不限男女也

何氏九仙

按續文獻通考何氏九仙不知何名漢時兄弟九人居仙遊東北山中修道又居湖側煉丹成各乘赤鯉仙去名其湖曰九鯉湖山下遺銅杯鐵鞭後人卽其地建廟九鯉湖上亦有廟每大比歲士子祈夢者屢驗 按九江府志漢九仙不知何許人兄弟九人寓博陽山之巔丹成同日飛昇今所

古今圖書集成
居處名九仙臺

劉翊

按太平廣記劉翊字子朔潁川人有道德家世行仁普濟於人過師黃先生告翊曰子仁感天地陰德動鬼神太上嘉子用心使我授以長生之道吾仙官也爾能從我去否翊曰願從教乃隨入銅柏山中授以隱地之術服五星之華而今度名東華來在洞中爲定錄府右理中監

張奉

按太平廣記張奉字公先河內人也太傅袁隗常歎其高操後入剡山遇山圖公子授奉九雲水強梁鍊桂法在東華宮爲太極仙侯

真武

按續文獻通考真武淨樂國王太子生而神靈察微知遠長而雄猛惟務修行志除邪魔遇紫虛元君授以道祕遂越東海遊覽又遇天神授以寶劍入武當山修煉居四十二年功成白日飛昇奉上帝命往鎮北方披髮跣足躡離坎真精建皂纛元旗統攝元武之位神威赫然歷代顯著本號元武